



Guet Nacht – S' isch Ahti

S Ahti Gleggli lyttet schoo,
Jetz isch Zyt zem haime goo,
Uff em Wääg nit ummeschtoo,
Und der Wessels schloofe loo.

«Verdufft, verschwind, haus uss dämm Gärtli use,
S'isch Ahti gsi, bliib nimme hogge, gang go pfuse,
S gitt kai Bier mee, kai Gschnurr und au kai Lache»,
E Regierig, wo so ebbis wott, isch nit ganz bache.

Dien uns doch im Summer scheeni Gärtli logge,
Wo de nochem Biggle wetsch gmietlig dusse hogge,
Losch unter alte Baim dii Alltagsstress lo aabedropfe,
Oder duesch mit Frinde e gmietlige Banduur glopfe.

Dasch verbyy, kasch z oobe kain me go schnabbe,
Der Wessels schliesst ab, losst d Trottoir uffeklabbe.
Als Oschtschwyzler het äärs halt noonig im Bluet,
Ass Basel bikanntig anderscht thigge duet.

Ooder wott äär ebbe nur d Bolizei untersttize,
Well die uns Basler dehaime ka besser schitze?
Z Nacht blyybt d Stadt nur no offe fir Assylante,
Oder anderi, liechtschyychi Fagante.

Der hibschi Sir Morin, King vu unserer Stadt,
Findet soone Zueschtand aigetlig no sauglatt,
Äär macht fir sich do druss nämlich s Beschte,
Goot mit Styrygälder no Shanghai go feschte.

Kasch bi uns z Oobe nimme d Sau uuseloo,
Dooderzue muesch mit em Morin uff Moskau goo.
Soo dummi Vorschrifte gänn uns der Räscht,
Die mache uss Basel e langwilligs Näscht,

Ahti z oobe isch verbyy,
Bebbi muesch dehaime syy,
Kasch unbesoorgt ins Bettli goo,
Unsere Morin isch wiider nit doo.

Unseri subber Regierig ka no vyyl mee bschliesse,
Dermi si Basel kenne als Provinznäscht gniesse,
So daarf der 10er nit diräggt zem Bahnhof faare,
Är kenni jo unterwägs e sältene Schnäg iberkaare.

Sogaar s Tatroo wird jetze z Basel verbotte,
Wääge de lutte Duudelsegg vo dääne Schotte,
Au d Hindeler wänn dä Aaloss bi uns nit ha,
Well der Fifty sy Schtammabaum nimmi finde ka.

Der Wessels duet sich au saggstaarg engagiere,
Wott die Fūmoar Baize ummsveregge ussradiere,
Well e multikulti Subkultur wo niemerts steert,
Inne Provinzkaff wie Basel nit aanegheert.

Bi uns ischs au verbote Solaarzälle z baue,
In der Kärnzooone dääte die s Stadtbild versaue,
Drumm machts der Wessels fir syy Dach elegant,
D Schutzzoone wird verschoobe, dasch kulant.

E Regierig wo nuur aigeni Inträsse vertritt,
Bruche mir bi uns z Basel wiirgglig nit,
Und wär d Stadt zem Provinzkaff losst verkoo,
Soll gfelligscht der Huet nää und goo.

Schloof Bebbi schloof,
In der Regierig do hets Schoof,
Seggle nur iire Inträsse noo,
Und löön uns drumm im Rääge stoo,
Schloof Bebbi schloof